




# Wenn

(ASP650— 20.05.2015)



Wenn Arbat suochscht, mit guot verdiona,  
fiondscht, wenn du ehrle uftrietscht niona  
an Tschop, wo d' wenig schaffa muoscht.

Denn lichter scho mit Lügo tuoscht.


Mit redlä si, ganz ehrlä bloß  
blibscht, was dir reocht gschicht, arbeitslos.

Wenn d' weder stiolscht, no bschießt, no lügst.,  
wenn d' nid amol do Staat betrügscht,  
wenn d' Kirche nid om d' Stür du bschiescht,  
dass d' nid vo hüt bioscht, du bewiescht.

Uf uos ma siocher druf go ka,  
di stellt kuon Stüberotar a.  
So Lüt wio di, dio bruchtit meh  
die all meh schrumpflig Heilsarmee.


# Do Ma im Mo

(ASP651— 23.05.2015)



As heat do Ma im Mo  
dur d' Medien wiossa lo,  
dass er nid ernscht wöro gno.  
Ma söttit iohn verstoh,  
dass er ou druf sei ko,  
wio 's iohm tät besser go.  
Wil er sä nid reocht trou,  
suoch er wio d' Buro-n-ou,  
uf deom Weog sä a Frou.

Ob blöd, däs sei iohm gli,  
sie söt blös sexy si.  
Ar sei halt ou an Ma,  
wo nid - us siro Rollo ka.



---

Wer stolz ischt, heat kaum derfür Grund .  
A-n-Oagolob gloubt uom kuon Hund.  
Wer ischt mit Reocht scho arrogant ?  
amol nid uona mit Verstand.  
Do Pris für z' viel Stolz, gloub 's, ischt gnau:  
... as ma uos u'froglä kuo Sau !!!,




Profeto git as meh as gnuo.  
Für 's Weoter d' Amsla, wio ma seit.  
Däs heat zum Beispiel dermit z' tuo.  
wio ma ihr Obotliod usleit.

A-n-Amsel kündigt an Reogo-n-a.  
Obwohl fuf Tön sie gad blös ka,  
idem sie 's kuschtvoll kombiniert,  
sie luschtvoll Liodlä komponiert.

A Zwotä, gär nid wit dervo,  
will woallä gwioß zur Hilf ihr ko.  
Sie variiert licht d' Melodie;  
As künt nid ifallsricher si.

Von Amsla 's Zwigschpröch 's amüsant  
verlouft für hüt amol im Sand.  
's U'weoter heat für des Mol trogo,  
heat vor as ko ischt ... sä verzog.

Dio Profezeiung ischt derneobo.  
So isch-as mit Profeto-n-eobo.




---

I kenn uon, wo an andro kennt,  
ar ischt alls ehnder as dement,  
vergioßt blös Nämmo ab und zuo.  
Ar wioß nid, was dergegot tuo.

Ar säg, dass mämol er nid woaßt  
sogär wio er ga seolber hoasst.  
Ar seit ma iohm versichrat hei,  
alls ehnder as dement ar sei.

Dementa muoscht dä nid schenioro.  
Wenn d' elter würscht, heascht meh as gnuo,  
daß nid no wioslos würscht, du z' tuo  
wio ma so seit do z' Doarobioro.




An Gfallo i döt seolb dra hio,  
dass seolber i reocht z'frido bio.  
I bild döt druf mir gär nünt i.  
As künt mir 's eopar niedrig si.

U'zfrido si ma vielmol künt.  
Blös hioft däs nünter uom as nünt.

I säg nid witer, wio däs goht.  
Wil z'frido si ischt lichter, wenn  
ma andre usör bliebo lot.  
Bis gnuo, wo usör siond, i kenn.


Zu minom z'frido si derzuo,  
Ghört zwor ou a klä "usör tuo".




An klina Stern am Firmament,  
wo niomig no sin Nammo kennt,  
wo ma vo freiom Oug nid siocht,  
strahl meh as tausot Sunna Liocht.

Dio Sterno, wo nid z' seochot siond,  
wänd säga üs, mir siond blind.  
So wio sie üs ou wiossa lond,  
wio klän sei üsrä Horizont.

Do Mensch halt nid durschoua ka  
do Sio vo Gottes Schöpfungs-Pla !  
Ar heat z' meischt mit si seolber z' tuo  
ischt halt - im Sandkaschto dahuo.





Bad

(ASP657—07.07.2015)



Schütt doch nid 's Kiond us mit dem Bad.  
Du sötischt jo scho Obacht gio.  
As ischt nid z' letscht om 's Wasser schad,  
vom Kiond will i nid gredat hio.

---

(ASP657—07.07.2015)





# Nid nünt

(ASP658—12..04.2016)



Gwioß heat do Heargot nid nünt dänkt.  
Humor heat er mir bis gnuo gschänkt.  
Mit mir heat gmuont ar 's gwioß blös quot.  
Ar würd scho gwiosst hio, was ar tuot.  
I red iohm gwioß nio numma dri.  
As künt jo no viel gschiossnor si.

---

(ASP658—12.04.2016)